

- 1^r Es ist der narren güt enberen
- 2^r Die allzyt mit steyn werffen gern
- 3^r Vnd wend keyn straff vnd wyßheyt lern



Von spott vogelen

- 1 Jr narren / wellen von mir lern
- 2 Anfang der wyßheyt / vorcht des herren
- 3 All kunst der heiligen ist gespreit
- 4 In den weg / der fürsichtikeyt

5 Von wyßheytt würt der mensch geert
 6 Von jr all tag / vnd jor gemert
 7 Eyn wyser ist nütz der gemeyn
 8 Eyn narr syn kolben dreitt alleyn
 9 Vnd mag vor wyßheytt hören nitt
 10 Er spott der wysen zů aller zyt
 11 Wer eyn spott vogel leren wil
 12 Der macht jm selbst gespöttes vil
 13 Wer strofft eyn boßhafftigen man
 14 Der henckt jm selbst eyn spätlin an
 15 Eyn wysen stroff / der hört dich geren
 16 Vnd yllt / von dir me wyßheytt lern
 17 Wer eyn gerechten stroffen düt
 18 Der hat von jm syn stroff für güt
 19 Der vngerecht geschändet vil
 20 Vnd würt doch selbst geschánt by wil
 21 Der háher eyn spottvogel ist
 22 Vnd ist doch vil / das jm gebrist
 23 Wann man eyn spötter würfft für thür
 24 So kumbt mit jm / all spott hyn für
 25 Vnd was er zanck vnd speywort tribt
 26 Das selb dann vor der túren blybt
 27 Hett Dauid nit syn selbs geschont
 28 Nabal wer syns gspöts gelont /
 29 Sannabalach syn spottes ruwt
 30 Do man die mur Hierusalem buwt
 31 Die kynd wurdent von Beren gdót
 32 Die glatzeht schulden den prophet
 33 Semey hat noch gar vil sün
 34 Die gern mit steynen werffen tün